

SEDANVM & RAVCORTIVM, &c.

Ducis Baillionensis, Bibliotheca erigi cœpta est, quæ hortatu ac studio D. Iustelli I. C. Secretarii Principis, magnique literarum ac literatorum fautoris, brevissimo tempore omnis generis, facultatumque variarum libris supra modum aucta fuit.

Cives.

Cives humani, seduli, industrii, partim opifices, partim mercatores. Inter illos excellunt armamentarii, qui ex ferro armaturas omnis generis cudunt, loricas, thoraces, galeas, sclopeta, eaque probatissima & per universam Galliam expetita. Nec desunt hic, qui lanam tractent, & in varias formas texant. Nec minus arma tractare norunt, ac si veterani essent ac bello assueti.

Alluit urbem Mosa, cujus ripæ usque adeo imminet, ut aquis suis molas in cavitate propugnaculi cujusdam in Mosam prominentis extructas circumagat. Duo in urbe templa sunt, unum vetus, in quo per vices Catholici & Reformati conciones habere solebant. Alterum novum, forma oblonga ac rotunda, quam ovalem vocant, in quo jam reformati soli concionantur, concessio Catholicis templo veteri. Suos novum illud habet peridromos, ut maximam auditorum frequentiam admittat, quorum omnium oculi in concionatorem dirigi possunt. Ædes fere omnes ex vivo lapide ac durissima petra constant, quæ ex vicinis montibus excinditur. Tecta imbricatim assurgunt, plateæ latæ satis & patentes, ut urbs hæc tum civium modestia ac morum probitate, tum ædificiorum elegantia ac mercatu, reliquis omnibus vicinis urbibus præcellat.

Et, ne quid desit, adversus bellicos insultus munitissima est: propugnaculis suis sibi invicem respondentibus validissima, quæ ipsa proxime ambit murus, è lapide ad hos usus exciso, cujus copiam præbent montes vicini, inprimis fossæ castellum seu arcem cingentes. quæ ob

lapides quotidie erutos in profunditatem tantam dehiscunt, ut abyssus desuper spectantibus appareant. Qua parte urbis lateri montes adjacent, imminet illi Castellum sive Arx, quæ ^{Arx.} sensim ex humiliore loco, versus montium fastigia ascendit. Valida est, magna, patens, propugnaculis suis terribilis ac invicta, ea arte fabricata, ut vicina montium nocere obsessæ non queant. Fossæ itidem profundæ ac stupendæ altitudinis. Armis, tormentis bellicis, omniique apparatu Martio instructissima est. Sedem hic sibi ac domicilium deligit Princeps Sedanensis.

Dominium hoc fuit hæreditarium Dominorum ^{Principes.} de la Marche, quod tandem, desiderata prole mascula, ad filiam Charlottam de la Marche devolutum, cessit Henrico Turonio Vice-comiti de Tureyne, &c. primo Galliarum Mareschalco, qui dictam Charlottam matrimonio sibi junxerat. Atque hic quidem princeps, Bulionii quoque Dux, mirum quam urbis hujus res auxerit, civibus, incolisque dilectissimus, qui non tam rectorem se iis dominumque quam patrem præbuit, heros comitate juxta ac gravitate venerabilis, maximæque apud Henricum IV Galliarum regem autoritatis, pacis ac belli studiis clarus, doctorum quoque Mecænas ac patronus. Nullius juri ac potestati subest, ipse in hoc suo territorio ^{αὐτοκράτωρ} ac Monarcha. Magistratus politicos simul ac Ecclesiasticos unus ordinat. monetam cudit, supremæ potestatis officio.

Nuper illi præfuit Elizabetha Nassovia, vidua Guilielmi Principis Auriaci, ex Charlotta Borbonia, filia Ducis Montpesierii, filia, nupta Henrico Turonio, post defunctam Charlottam de la Marche. Filius illius nunc est princeps Sedanensis, ac Dux Bullionius, qui sub Illustrissimis Ordinibus Federatis ac Auriaco Principe militans, equestribus turmis præfectus, patriis virtutibus se non minorem ostendit.

